

मार्निंग डोगरी न्यूज़ बुलेटिन, समें. 09-20 Hrs



## Headlines

1. लोकसभा दे चौथे गेड़ दे चुनां लेई प्रचार हारे तेज होई गोआ ऐ। जम्मू कश्मीर दी श्रीनगर सीट लेई इस गेड़ तैहत 13 मई गी वोट पोआए जांगन।
2. श्राष्ट्रपति द्रौपदी मुर्मू होरें डुग्गर दे लोक कलाकार रमालो राम होरें गी कल पद्म पुरस्कार कन्नै सम्मानत कीता।
3. समूलचे जम्मू संभाग च अज्ज परशुराम जयंति दा पर्व मनाया जा'रदा ऐ। उपराज्यपाल मनोज सिन्हा होरें लोकें गी इस पर्व दियां ममारखां दित्तियां न।
4. भारत ते बरतानिया बश्कार कल नमीं दिल्ली च सलाना रणनीतिक गल्लबात होई। दौनें मुखें रणनीतिक सांझ-भ्याली गी होर तगड़ा बनाने ते वैश्विक सुरक्षा चुनौतिएं बारे बचार सांझे कीते।
5. जम्मू दे डिवीजनल कमीशनर होरें विस्थापित लोकें ते पच्छमी पाकिस्तान दे रिफ्यूजिएं लेई माली मदाद आली योजना दी अमलावरी दा जायजा लैता।



## 4<sup>th</sup> Phase

लोकसभा चुनाएं दे चौथे गेड़ लेई प्रचार अभियान होर बी व्यापक ते तेज होई गोआ ऐ। इस गेड़ च जम्मू कश्मीर दी श्रीनगर लोकसभा सीट लेई 13 मई गी वोट पाए जाने न। इस पार्लिमानी हल्के च कुल 24 मेदवार चुनां मैदान च न। इनें 24 मेदवारें दे सियासी भविक्ख दा फैसला 17 लक्ख थमां बद्ध मतदाता करगंन। मुख् मकाबला कांग्रेस समर्थित जम्मू कश्मीर नैशनल कांफ्रेंस दे मेदवार आगा रूहुला मेहदी, जम्मू कश्मीर पीपल्स डैमोक्रेटिक पार्टी दे वहीद-उर-रहमान परा, जम्मू कश्मीर अपनी पार्टी दे मेदवार मोहम्मद अशरफ मीर ते डैमोक्रेटिक प्रोग्रेसिव अजाद पार्टी दे मेदवार आभिर अहमद भट्ट हुंदे बश्कार ऐ।



PDP Srinagar

जम्मू कश्मीर दे चुनां प्रशासन नै पीडीपी दे मेदवार वहीद—उर—रहमान परा होरें गी उंदे ओकडे ब्यान पर स्पष्टीकरण देने लेई आखेआ ऐ जेहदे च उनें कश्मीर दे नोजवानें गी एह अपील कीती ही जे ओह नमीं दिल्ली गी इक संदेस भेजने लेई इनें आम चुनाएं गी जनमत संग्रह मन्नन। चुनां प्रशासन नै परा होरें गी इब्बी आखेआ ऐ जे ओह ऐसी ब्यानबाजी नेई करन जेहदे नै समुदायें बशकार बित्थ पैदा होए। आदर्श आचार संहिता सरबंधी नोडल अफसर होरें परा होरें गी इस नोटिस दा जोआब देने लेई दऊं दिनें दा समा दित्ता ऐ। नोटिस च इब्बी आखेआ गेआ ऐ जे बेल्ले सिर एहदी पालमा करने पर उंदे खलाफ कनून तैहत कारवाई बी कीती जाई सकदी ऐ। तोआई परा होरें आखेआ ऐ जे ओह भारत दे संविधान दे प्रति वफादार न ते जनमत संग्रह लफज दा इस्तेमाल करियै ओह शड़ा लोकें गी बधी चढ़ियै चुनाएं च शामिल होने दी गल्ल गै आखना चांहदे हे।

<><><><><><><><>

### Padma Award

राष्ट्रपति द्रौपदी मुर्मू होरें कल राष्ट्रपति भवन च पद्म पुरस्कार भेंट कीते। जम्मू कश्मीर दे रमालो राम होरें गी कला दे क्षेत्र च उंदे यागेदान लेई पद्मश्री कन्नै सम्मानत कीता गेआ। आकाशवाणी जम्मू संवाददाता दी रिपोर्ट मूजब रमालू राम होर जम्मू खित्ते दे रौहने आले न ते ओह डोगरी दे लोक कलाकार न। उनें गीतरू ते भाख गी परतियै जीवंत करने लेई बड़ा कम्म कीता ऐ। उधमपुर जिले दे रामनगर इलाके च पैदा होए दे रमालो राम होरें जम्मू यूनिवर्सिटी थमां 1985 च ग्रैजुएशन कीती ते एहदे मगरा 1987 ओह सरकारी अध्यापक लग्गे। उनें डोगरी कविता ते गीत लिखना शुरू कीते। 1980—81 थमां उनें रमालो राम ते पार्टी दे बैनर हेठ डोगरी लोक कला सरबंधी अपनी प्रस्तुतियां देना शुरू करी दित्तियां। उनें लम्मे चिरे तगर जम्मू खित्ते च कम्म कीता ते फही मिशन मा डोगरी नां कन्नै नमीं शुरूआत कीती। मिशन मा डोगरी बड़ी बड्डी सफलता साबत होआ। केई सारे युवा इसदे कन्नै जुड़े, तकरीबन 150 विद्यार्थी इसले उंदे थमां रिवायती कला दी सिखलाई लै'रदे न।

<><><><><><><><>

### Parshuram Jayanti

अज्ज परशुराम जयंति मनाई जा'रदी ऐ। उनेंगी भगवान विष्णु हुंदा अवतार बी मन्नेआ जंदा ऐ। परशुराम जयंति हिंदू कलेंडर दे बसाख म्हीने दे शुक्ल पक्ख दी तृतीय तिथि गी मनाई जंदी ऐ। मुख्य भरै दे होरने हिस्से आला लेखा भगवान परशुराम हुंदी जयंति जम्मू कश्मीर च बी मनाई जा'रदी ऐ। केई थाहरें पर बडलै प्रभात फेरी कड्डी गई। उपराज्यपाल मनोज सिन्हा होरें भगवान परशुराम जयंति ते अक्षय तृतिया दे मौके पर लोकें गी शुभकामनां दित्तियां न। अपने सनेह च उपराज्यपाल होरें सब्बने दी खुशहाली दी कामना कीती। उनें गलाया जे भगवान परशुराम, धर्म, दलेरी ते करुणा दे प्रतीक हे। उंदी सिक्खेआ मानवता गी अग्गे बी प्रेरित करदी रौहग। उनें मेद जाहर कीती ऐ जे पवित्र ध्याड़ा सब्बने लेई शांति ते खुशहाली लेइयै आवै।

<><><><><><>

## Uttarakhand

उत्तराखण्ड च अक्षय तृतीय दे मौके उप्पर केदारनाथ धाम दे कपाट अज्ज पूरी रीति-रिवाज कन्नै विधिवत तौरा पर खोली दित्ते गे न। इस मौके पर उत्तराखण्ड दे मुख्यमंत्री पुष्कर सिंह धामी होर बी मजूद हे। अज्ज बडलै वैदिक मंत्रोधारण कन्नै केदारनाथ धाम दे कपाट खोली दित्ते गे। इस मौके पर बड़ी मती गिनतरी च श्रद्धालु उत्थें मजूद हे। केदारनाथ धाम गी तकरीबन 20 क्विंटल गुट्टे दे फुल्लें कन्नै सजाया गेदा ऐ। गंगोत्री ते जमुनोतरी धाम दे कपाट बी अज्ज गै खोले जा'रदे न। तोआई राज्य सरकारै चार धाम यात्रा लेई सुद्धे प्रबंध कीते न। इस ब'रे 22 लख शा मते श्रद्धालुएं इस पवित्र यात्रा लेई पंजीकरण करोआया ऐ।

<><><><><><>

## Ramban

रामबन दे एडीसी रोशन लाल होरें इक बैठक लाइयै परनोट च जमीन धस्सने आले मामले च होए दे नुक्सान ते राहत सरबंधी कम्में दा जायजा लैता। प्रदेश आपदा प्रतिक्रिया फंड तैहत्त मुख् ध्यान जमीन जदैद ते फसलें गी होए दे नुक्सान गी पूरा करने लेई माली इमदाद उपलब्ध करोआने पर दित्ता गेआ। बैठक दरान राहत पजाने लेई सरबंधी मामले उंदी तस्दीक ते प्रक्रिया दा बी जायजा लैता। इस दरान 81 मामलें पर चर्चा होई। मुआवजे गी बंडने आले कम्में गी तौले पूरा करने लेई गलाया गेआ तां जे प्रभावत परोआरें गी बनदी सहायता उपलब्ध करोआई जाई सकै।

<><><><><><>

## India-UK

भारत-बरतानिया बश्कार सलाना सामरिक गल्लबात कल नमीं दिल्ली च होई। भारत दे राष्ट्री सुरक्षा सलाहकार अजीत डोभाल होर बरतानिया दे राष्ट्रीय सुरक्षा सलाहकार टिम बैरो हुंदे कन्नै इक मीटिंग दी सह-अध्यक्षता कीतीफ। मीटिंग दरान व्यापक सांझ-भ्याली ते कुलसंसारी सुरक्षा चुनौतिएं बारे चर्चा कीती गई। विदेश मंत्रालय दे प्रवक्तारंधीर जयसवाल होरें आपखेआ जे मीटिंग दा मुख् ध्यान प्रौद्योगिकी ते सुरक्षा सरबंधी पैहलकदमिं पर हा, जेह्डी दपक्खी सरबंधै ते सांझ-भ्याली गी होर तगड़ा करने च महत्वै आली भूमका नभा'रदा ऐ। उनें आखेआ जे दौनें मुख् आपसी हितें आले इलाकाई ते कुलसंसारी मुद्दें पर बी चर्चा कीती। साढ़े संवाददाता मूजब भारत ते बरतानिया बश्कार 2004 थमां गै रणनीतिक सांझ-भ्याली ऐ। दौनें मुख् बश्कार बपार, अर्थबवस्था, सेहत, विज्ञान-टेक्नोलाजी, रक्षा, सुरक्षा, दौनें मुख् दे लोकें बश्कार आपसी सरबंध ते जलवायु परिवर्तन सनें मते पक्खें आले बक्ख-बक्ख मुद्दें पर बी बहु-आयामी सरबंध न।

<><><><><><>

## DRDO

डीआरडीओ नै घोषणा कीती ऐ जे ओहदी इक लैबाटरी नै अत्याधुनिक एयर ब्रिदिंग इंजन लेई तरल रैमजेट ईंधन विकसित करने च कामयाबी हासल करी लैती ऐ। इस ईंधन दा कल डीआरडीओ दी इक लैबाटरी च कामयाबी कन्नै रैमजेट परीक्षण कीता गेआ। इस ईंधन दे विकास च बीपीसीएल ते एमओसी उद्योगी भ्याल न।

<><><><><><>

## Div.Com-Jammu

जम्मू दे डिवीजनल कमीशनर रमेश कुमार होरें मुत्तलका अफसरें कन्नै इक बैठक लाइयै विस्थापित लोकें ते पच्छमी पाकिस्तान रिफ्यूजिएं गी दित्ती जाने आली माली सहायता दा जायजा लैता। आकाशवाणी जम्मू संवाददाता दी रिपोर्ट मूजब डिवीजनल कमीशनर होरें गी ताजा स्थिति दी जानकारी दित्ती गई। उनेंगी हाल च हासल दावे बारे बी दस्सेआ गेआ। जम्मू कठुआ ते सांबा दे डिप्टीकमीशनर मुत्तलका जिले च मंजूरी हासल मामले दी गिनतरी, जेह्ड़े नामंजूर होए ते बकाया पेदे मामलें बारे जानकारी दित्ती। डिवीजनल कमीशनर होरें मुत्तलका अफसरें गी हिदायत कीती जे ओह माली सहायता स्कीम बारे योग्य विस्थापित लोकें गी जागरूक करन तां जे एह लोक एहदे थमां बद्धोबद्ध फायदा ठोआई सकन।

<><><><><><>

## Doctor Apke Dwar

समाज दे गरीब तबकें पर पौने आले इलाज मुआलजे ते सेहत सरबंधी खर्चें दे बोझ गी घट्ट करने दी इक कोशश तैहत पाड्डर दे ब्लाक मैडिकल अफसर होरें इक मुफ्त मैडिकल कैंप दा आयोजन कीता। किशतवाड़ दे जिला अस्पताल थमां वरिष्ठ डाक्टरें इस कैंप च हिस्सा लैता। इस मौके पर तकरीबन डेढ़ सौ मरीजें दी बक्ख-बक्ख बमारिएं लेई जांच कीती गई। जांच दे अलावा इस मौके पर मरीजें दे मुफ्त लैबाटरी टैस्ट बी कीते गे।

<><><><><><>

## DC-Kathua

कठुआ दे डिप्टी कमीशनर डॉ. राकेश मिन्हास होरें मुख्ख राई-बाई अधिकारी संजीव राय हुंदे कन्नै बन्ने आले ग्राएं चक्क-शब्बे, कोट पुनु ते सुल्तानपुर दा दौरा लाया ते राई-बाई सरबंधी उपकरण बंडे तां जे राई-बाई सरबंधी गतिविधिएं गी बढ़ावा दित्ता जाई सकै। फ मगरा डिप्टी कमीशनर ते मुख्ख राई-बाई अधिकारी होरें

बसार तैआर करने सरबंधी इकाई दा बी दौरा लाया। इस दरान मकामी करसानें दी सफलता दिएं कहानिएं गी बी सांझा कीता गेआ जिने नमीं तकनीकें गी अपनाइयै एह सफलता हासल कीती ऐ।

<><><><><><>

## DC-Jammu

जम्मू दे डिप्टी कमीशनर सचिन कुमार वैश्य होरें लोक निर्माण मैहकमे दे वरिष्ठ अफसरें कन्नै बैठक लाई ते जारी शिडक परियोजनाएं दी स्थिति दा जायजा लैता। डिप्टी कमीशनर होरें कम्में गी पूरा करने लेई रणनीति बनाने ते पैहल दी बिनाह पर कीते जाने आले कम्में बारे पता लाने लेई गलाया तां जे लोकें दिएं जरूरतें गी बेहतर ढंगै सिर पूरा कीता जाई सकै। उनें कम्में दे मयार गी बनाई रखने दे महत्व गी उजागर कीता ते अफसरें गी हिदायत कीती जे ओह पैहल दी बिनाह पर कीते जाने आले कम्में गी तरजीह देन। उनें लोकें दी मंगें गी पैहले हल करने लेई गलाया। डीसी होरें होरें कम्में गी सुचारू ढंगै सिर पूरा करने लेई कुसै बी रूकावट जां होर कुसै समस्या गी हल करने दी जरूरता पर जोर पाया। उनें कम्में गी समें सिर पूरा करने लेई सरबंधी लोकें गी प्रेरित करने पर बी जोर पाया।

<><><><><><>

## IPL

आईपीएल क्रिकेट च जंदी रातीं रॉयल चैलेंजर्स बैंगलोर ने पंजाब किंग्स गी 60एं रंजें कन्नै हराई दित्ता। जंदी रातीं हिमाचल प्रदेश दी धर्मशाला थाहर खेड्डे गोदे मैच रॉयल चैलेंजर्स बैंगलोर आस्सेआ दित्ते गो 242 रंजें दे लक्ष्य दा पिच्छा करदे होई पंजाब दी टीम 17 ओवरें च 181 रंज पर ऑल आउट होई गई। अज्ज अहमदाबाद दे नरेन्द्र मोदी स्टेडियम च गुजरात टाइटंस दा मकाबला चेन्नई सुपर किंग्स कन्नै होग।

<><><><><><>